

Communicaziun allas medias digl cumegn da Surses (nr. 01-2017)

Surses: igl cumegn vot promover la construcziun da letgs tgods

Igl cumegn da Surses vot promover la construcziun e la sanaziun da hotels e travagls d'alloschamaint cun contribuziuns finanzialas à fonds perdu. I dessan neir reservos persiva 3 milliuns francs. La radunanza communal da glindesde seira è neida orientada da moda extendeida davart l'introducziun digl program da promoziun. Dumondas da sustign concretas on da neir approvas dalla radunanza communal.

Igl cumegn da Surses vot far labour antiera. Per rinforzar igl turissem duess neir promoveida la construcziun da hotels e travagls d'alloschamaint cun letgs tgods ma er la sanaziun d'objects existents. La suprastanza ò oriento a caschung dalla radunanza communal digls 10 d'avregl extendeidamaintg davart igl program da promoziun planiso. Previa ègl da metter a disposiziun contribuziuns à fonds perdu da 3 anfignen 5% dalla somma d'investiziun. Igl dretg ad ena contribuziun da promoziun pò neir fatg valeir tar ena somma d'investiziun da minimum 5 milliuns francs tar la construcziun d'objects novs u da 2.5 milliuns francs per la sanaziun da travagls existents. Gl'import exact dalla contribuziun dapenda da criteris definias, scu p.ex. la muntada digl project per la regiun, igl domber da plazzas da labour novas tgi vign stgaffia u igl risguardar la mastranza locala tar la realisaziun dallas lavours da construcziun u da sanaziun. Igl program da promoziun vign limito per antant sen 5 onns.

Reservar 3 milliuns francs

Igls meds finansials da 3 milliuns francs per la realisaziun digl program da promoziun vot la suprastanza metter a disposiziun da prancepi or dalla contribuziun da fusiun dad 8.4 milliuns francs tg'igl cumegn ò survagnia. Cun la construcziun da letgs tgods u la sanaziun da hotels e travagls d'alloschamaint existents duess neir promovia igl sectour digl turissem en an chest senn er igl commers e la mastranza dalla regiun. Igl davos pled an tgapetel on pero an mintga cass las votantas ed igls votants. Eventualas dumondas da contribuziun concretas on da neir approvas dalla radunanza communal.

Ulteriors sclarimaints dat igl mastral Leo Thomann (telefonign 079 405 96 73)

Tinizong, 11 d'avregl 2017